

Presidente di Parlamento drs. Paul Croes pa loke ta Formacion Social



“MI KIER ACENTUA CU E SOSTEN DI E FAMILIA TA ESENCIAL DEN E TRAYECTO AKI”

Diabierna siman pasa e grupo di 12 hoben cu a pasa nan prome fase di e proyecto Formacion Social cu ta ensera un training militar den Mariniers Kazerne den un ambiente familiar y placentero a ricibi nan certificado y baret.

Presidente di Parlamento drs. Paul Croes tambe tabata presente na Mariniers Kazerne pa hunto cu e hobennan y nan mayornan celebra e bunita logro aki.

Presidente di Parlamento Croes a cuminsa na felicita e 12 hobennan, nan mayornan y familia.

“E ley aki di Formacion Social a pasa unanimamente den Parlamento na luna di october 2011 y awe nos ta mira su frutonan. E paso aki tuma ta brinda e hobennan aki oportunidadnan di awor padilanti.

Mi kier acentua cu e sosten di e familia den e trayecto aki ta esencial”.

Croes a splica cu el a combersa cu e cursistanan y loke a resalta ta cu e parti di disciplina ta importante pa nan cu a yuda forma nan caracter y haci’e fuerte.

“Esaki sin duda t’e parti posi-

tivo di e programa. Naturalmente nos kier mira e programa aki amplia den un cantidad mas grandi di cursista. Loke ta demostra claramente cu e programa aki ta bon ta wordo refleha den e cantidad di hende cu ta inscribi pa participa. E biaha aki mas di 40 hoben a inscribi y e grupo cu a keda selecta ta cuminsa otro siman caba. Formacion Social ta un iniciativa di Gobierno di Aruba. Parlamento a apoya esaki. Nos ta spera cu mas hoben por participa y den futuro por inclui damanan tambe pa por forma parti di e programa aki”.

Cu atencion Benito Croes y su señora Olga, mayornan orguyoso di un di e cursistanan, a scucha Presidente di Parlamento Paul Croes comenta riba e programa Formacion Social. Nan ta satisfecho cu nan yiu a cumpli cu e prome fase.

Benito a bisa: “Esaki ta un bon iniciativa di parti di Gobierno. Mi ta aplaudi’e. Ta algo cu tabata haci falta hopi tempo caba. Sigur despues cu dienstplicht no ta existi mas. Mi ta apoya Gobierno pa sigui cu e programa aki y pa ampli’e”.

